




too pig to fail

nur e z fetti Sau rettisch au


D Wirtschaftswält setzt hit global
Uff unbrämsts Waggstum, s isch fatal
Vo Kapital, Konsum und Gschäftli, krumme
Mir spiile gyyrig mit, mir Dumme
Wenn s Gäld nit längt, halt uff Kredit
Wo s bi de Bangge billig git
Zem Agglo-Hysli sich go z baue
Wo d Landschaft frässe und versaue
Au fir en offroad-Luxuskaare
Zem Goofe schnäll in Kindsgi z faare
Fir Laptops in de Kinderzimmer
Samt Flatscreen, drunter giengs hit nimmer
Fir dr Feeriedraim all-inclusive
Vo'r Arggtis schnäll uff d Maledive
Alles uff Bump mit Zinse, feschte
Wo d Bangge sich draa sauwool meschte
S dien Bängger aim aalglatt verfiere
Mit lusche Bangg-Gschäft z spegguilere
Wingge mit Gwinn, saumässig fette
'No Risk' schyynts, s looni sich drum z wette
Griege fir s Bschyse seyisch Booni
Hesch gmaint fir Laischtig? – nai, dängg ooni!



S baut Kreti, Pleti – nimm wär d witt
E Kartehuus us vyyl Kredit-
Karte – das gracht bi Gegewind
Brombt in sich zämme, zimli gschwind
Dr Schuldesoog wo jetz entstoot
Bringt glyy d Finanzwält us em Loot
Derbyy au, s isch e Hoon, e blangge
Groossbangge wo – grangg – sälber wangge
Wäg däm Zogge, em ruineese
Muesch se, grad au die adipeese,
Drotz de Milliardegewinn, de fette
Jetzt bletzlig mit Milliarde rette
Wel d Wirtschaft, wird ys fräch verkindet
Dr Undergang schyynts nit verwindet
Nadyyrilig, dasch dr Clou des Knüllers
Uff Keschte voll vo Meyers, Müllers
Wo wel die Bangge seiisch dien
No iiri Spaarsey metzge mien
Denn d Wullmilchsau, wo Aier lait
Die schlachtisch nit, het mer ys gsait
E Groossbangg syg, wie s neidytsch haissi
Too pig to fail – als Sau e z faissi.



Es git au, zaigt ys d Eurozoone,
Nazioone wo uff Bump gärn floone
Wo glotze, brotze, joo nit spaare
Vo Mykonos bis uff d Kanare
Wel s Euro billig git und rasch
Au wenn der s gar nit laischte kasch
Denn Styre zahle muesch dert nit
Wel s Styrbeförderung gar nit git
Und jede sich e Gspass druus macht
Der Staat fräch z bschyse, Daag und Nacht
S goot Griecheland dääwääg bangrott
Well bi däm Staat kain schaffe wott
Sotte si pinggtlig syy statt z penne
Muesch de Beamte Brämie brenne
Si laischte Service Public numme
Geg satti Euro, grossi Summe
E Land, wo vyyl sich nit geniere
Vom Staat draischt, schamloos z profitiere
Wo s d Ränke au noch hundert git
Ob d läbsch, das intressiert dert nit
Dä Augias-Stall muesch jetz, dasch s Drischte
Samt Papandreou uusemischte
S glyych Granggetsbild zaigt, lueg s doch aa
Sauscheen Bella Italia
Wo d Eurosubventioone au
Mafiees verschwinde, s steert kai Sau
Wo nyt goot ooni corruzioni
Das zaigt ne jo drBerlusconi
Doch d Italo, die mache cool
Drotz iirem diefe Schuldepfuul
Bella Figura zer Misere
Grad wie dr Capo Cavaliere
Da schlyycht vom Wragg, dä myys Cretino
Grad wie in Giglio dr Schettino
Vyyl Länder sindige gnauso bees
Wirtschafte massloos, desaschtreess
S duet halb Europa, warnsch vergääbe
Frivool iiber d Verhältnis lääbe
Isch blangg und no im Stoo k.o.
Am Abgrund und am Undergoo
Ziet soo, marood, alles bachab
Dr Euro druudlet und saggt ab
E Gryyse, wo mäanderet
Dr Woolstand unterwanderet.



Wenn Staate Schulde hänn, bompees
Git s Rettigsschirm in libergreessi
Wo d Schwoobe, wo no schaffe dien
Als Stroof alimentiere mien
S sugt an dr Bruscht vor Angie Merkel
Drum halb Europa, grad wie Ferggel
Doch d Euro sinn nit gratis z haa
D Frau Merkel ziet jetz d Schruube aa
S mien d Staate d Girtel änger schnalle
Nadyyrilig d Bangge nit, die bralle
Wo Glotz in fuuli Staate gänn
Und dä mit zimftig Zins zrug wänn
Drum vo dr Rettig vo de stiere
Staate am maischte brofitiere
S syge die Länder, wenn au blangg,
Too pig to fail – Schulde sei Dangg.



Au mir hänn unsri Leggtion gleert
Lege als Clique zue wie gsteert
An Personal und (merggsch s emänd ?)
Au an Volume und Talänt
Grooss sinn mir worde und esoo
Vyyl z faiss zem aimool undergoo
Sott unsri Blookere au mool blatze
Miesst – wett y druff e männg Batze –
Au s Committee flingg reagiere
In s Gämsbärg Echo inveschtiere
Es spannti bschtimmt, kasch Gift nää druff
E Fasnachstrettigsschirm ys uff
Als Saubänggerzug, do simmer digg
Too pig to fail – gseesch s uff ai Bligg.